

SINAR HARIAN 9/10/2016

Jadikan perpustakaan rumah kedua



Nik Wan (kiri) menerima cenderamata daripada wakil Perpustakaan UniSZA.

GONG BADAK - Universiti Sultan Zainal Abidin (UniSZA) bakal mengubah persepsi masyarakat mengenai perpustakaan yang dianggap sebagai tempat yang membosankan, sunyi dan tidak mesra pengguna dengan mengadakan pelbagai aktiviti menarik.

Timbalan Naib Canselor (Hal Ehwal Pelajar dan Alumni), Prof Dr Nik Wan Omar berkata, selari dengan pengajuran Minggu Perpustakaan UniSZA 2016 akan dijadikan sebagai medan terbaik bagi mengubah persepsi itu.

"Melalui slogan 'Perpustakaan Rumah Keduaku' ia dilihat mampu menyemai semangat dan kesedaran ramai untuk menjadikan 'lubuk ilmu' itu sebagai tempat menghabiskan waktu terluang.

"Malah, dengan kepelbagaiannya perkhidmatan yang ditawarkan di perpustakaan ini kita yakin dan percaya ia dapat memberikan manfaat yang baik untuk pengunjung," katanya.

Beliau berkata demikian ketika berucap merasmikan Minggu Perpustakaan UniSZA 2016 di Dewan Auditorium, di sini.

Menurut Nik Wan lagi, pelajar seharusnya memanfaatkan sepenuhnya peluang yang disediakan itu untuk menambahkan ilmu.

"Pelbagai sumber ilmu dan bahan bacaan yang tersedia untuk rujukan pelajar kerana ia bukan terhad pada buku semata-mata, tetapi lebih dari pada itu," katanya.